

**Govor zamjenice predsjedavajućeg Delegacije Parlamentarne skupštine Bosne i Hercegovine u Parlamentarnoj skupštini Vijeća Evrope (PSVE) Borjane Krišto na prvom dijelu redovnog zasjedanja PSVE tokom rasprave o poštivanju obaveza i angažmana Bosne i Hercegovine kao države članice Vijeća Evrope**

**Strazbur, 24. januar 2018.**

"Dame i gospodo, drage kolege,

Obzirom da danas u dijelu dnevnog reda raspravljamo o Bosni i Hercegovini koristim priliku da iznesem nekoliko po meni važnih činjenica.

Prema Aneksu IV Daytonskog sporazuma Bosna i Hercegovina je država koju čine tri konstitutivna naroda: Hrvati, Bošnjaci i Srbi kao i svi građani BiH.

Svi mi u BiH smo danas na prekretnici između napretka kroz euroatlanske integracije i nazadovanja kroz nekakav status quo kojega neki iz njima znanih razloga uporno održavaju.

Europski put je put napretka i stabilnosti za Bosnu i Hercegovinu i on uistinu nema alternativu. Činjenica je da sva tri naroda u BiH imaju različito viđenje njene budućnosti ali smo svi složni u tome da BiH vidimo kao buduću članicu EU. Stoga me na neki način i iznenađuje monitoring izvješće koji nije više pažnje posvetio ovoj tematici.

Ali je također i činjenica da je i izvješće i rezolucija dalo najviše pažnje najvažnijim pitanjima u BiH, a to je Ustav BiH i Izborni zakon koji po odlukama Europskog suda za ljudska prava i Ustavnog suda BiH sadrže diskriminatorne odredbe za koje je nužno pronaći rješenje na principu legitimnog predstavljanja i jednakopravnosti konstitutivnih naroda i građana BiH.

Posebno važno pitanje je promjena izbornog zakona koja se mora provesti zbog odluke ustavnog suda koji je neustavne odredbe stavio izvan pravne snage i zato se mora naći rješenje sukladno Ustavu BiH i relevantnim odlukama Ustavnog suda koji jasno kaže da jedan narod ne može drugom birati političke predstavnike.

Ustavni sud BiH također naglašava da se legitimitet upravo izvodi iz pojedinog naroda te da se prema općem načelu demokratije pravo na demokratsko odlučivanje

ostvaruje legitimnim političkim predstavljanjem koje mora biti utemeljeno na demokratskom izboru onih koje predstavlja i čije interese zastupa. Stoga samo legitimitet predstavljanja stvara temelj za stvarno sudjelovanje i odlučivanje.

Svakako još jedno od važnih pitanja u BiH je i reforma javnog radiotelevizijskog sustava koja treba uspostaviti jedinstveni i visoko decentralizirani javni radiotelevizijski sustav, dizajniran sukladno ustavnim ovlastima svih razina vlasti i ustavnim pravima tri konstitutivna naroda, nacionalnih manjina i svih građana.

EU perspektiva i puna ravnopravnost svih konstitutivnih naroda je osnov i pretpostavka opstojnosti, sigurnosti i daljnjeg razvoja Bosne i Hercegovine.

Nažalost svjedoci smo da se određeni politički predstavnici u javnosti i pred eurom predstavljaju kao zagovornici europske i stabilne Bosne i Hercegovine dok u stvarnosti čine sve na zadržavanju postojećeg stanja opstruirajući napore za postizanje kompromisnog rješenja utemeljenog na konsenzusu, te zapravo samo štete budućnosti BiH.

Vjerujem da uz iskreniji pristup i više političke volje koje možda u ovom trenutku nedostaje možemo doći do kompromisnih rješenja koja su nužno potrebna za BiH.

Još jednom napominjem da je Bosna i Hercegovina država tri konstitutivna naroda i da se upravo legitimni predstavnici tih naroda moraju dogovoriti o budućnosti BiH na principu jednakopravnosti jer je to interes prije svega BiH, njene političke stabilnosti, opstojnosti i njene evropske i euroatlantske budućnosti.

Hvala na pažnji!"